



Broj:

Sarajevo, 04.11.2020. godine

PRIMLJENO: 05-11-2020			
Organizaciona jedinica	Klasifikaciona oznaka	Redni broj	Broj priloga
01	50-1	2161/20	

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

n/r predsjedavajućeg, gđin. Nebojša Radmanović

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

ПОСЛАНИЧКУ ИНИЦИЈАТИВУ

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u roku od 30 dana od dana usvajanja ove inicijative, kao nosilac i koordinator aktivnosti, usaglasi sa entitetskim vladama revidirani dokument „Socioekonomske reforme u Bosni i Hercegovini za period 2020.-2022. godina“ i prateći Akcioni plan, imajući u vidu ekonomsku krizu uzrokovanu pandemijom koronavirusa (COVID-19) i neophodne mjere štednje u javnom sektoru i mjere pomoći privredi koje je potrebno poduzeti u narednom periodu u cilju oporavka ekonomije Bosne i Hercegovine.

Образложење

Vijeće ministara BiH je na 3. sjednici održanoj 30.01.2020. godine usvojilo dokument „Socioekonomske reforme u Bosni i Hercegovini za period 2020.-2022. godina“. Isti dokument prethodno su u oktobru 2019. godine usvojile vlade Federacije BiH i Republike Srpske. Ključne mjere dokumenta „Socioekonomske reforme u Bosni i Hercegovini za period 2020.-2022. godina usmjerene su na održiv i ubrzan ekonomski rast, veću konkurentnost privatnog sektora i bolje poslovno okruženje, depolitizaciju i povećanu efikasnost preduzeća u javnom vlasništvu, reformu zdravstvenog sistema i zaustavljanje odlaska mladih ljudi iz zemlje. Međutim, navedeni dokument usaglašen je i usvojen u uslovima kada nije bilo ekonomske krize uzrokovane pandemijom koronavirusa (COVID-19). Sada, nažalost, imamo potrebu da potpuno revidiramo planove ekonomskih i socijalnih reformi, kako na kratkoročnom, tako i na dugoročnom planu. Prema službenim podacima Direkcije za ekonomsko planiranje u prvoj polovini 2020. godine zabilježen je u Bosni i Hercegovini pad industrijske proizvodnje za 9,1%, pri čemu imamo značajan pad ukupne vanjskotrgovinske razmjene, uz stope pada izvoza i uvoza koje su od 15,1% do 18%. Prihodi po osnovu PDV-a u prvoj polovini 2020. godine manji su za 17,8%, što ukazuje na pad privatne potrošnje u strukturi BDP-a. Podaci iz domena javnih finansija za prvo polugodište ove godine ukazuju na drastičan pad u prikupljanju javnih prihoda u BiH. Tako su ukupni javni prihodi smanjeni za oko 8%, pri čemu su indirektni porezi umanjeni za 9,7%, a direktni za 6%.

Navedeni ekonomski pokazatelji ukazuju na potrebu hitnog revidiranja dokumenta „Socioekonomske reforme u Bosni i Hercegovini za period 2020.-2022. godina“, koji je za Vijeće ministara Bosne i Hercegovine i entitetske vlade ključni reformski dokument do kraja ovog mandata. Pri izradi revidiranog dokumenta fokus treba biti na pomoći privatnom sektoru koji je teško pogođen pandemijom koronavirusa (COVID-19) i podršci domaćoj proizvodnji koja je nužna u vrijeme smanjene vanjskotrgovinske razmjene, uz obavezno smanjenje potrošnje u javnom sektoru na svim nivoima vlasti, kako bi javni i privatni sektor ravnomjerno podnijeli teret ove krize. Osim toga, važno je voditi računa da se dokument metodološki pripremi na isti način kao i Reformska agenda za period 2015.-2018. godina, a to je da Vijeće ministara Bosne i Hercegovine bude nosilac aktivnosti i da dokument prvo bude usvojen na sjednici Vijeća ministara Bosne i Hercegovine, a nakon toga i na sjednicama entitetskih vlada radi daljeg usklađivanja¹. Zbog važnosti ovog pitanja i potrebe za hitnim djelovanjem, prijedlog je da se paralelno sa revidiranim dokumentom, odmah usvoje i prateći akcioni planovi.

Na kraju, neophodno je naglasiti da revidiranje dokumenta „Socioekonomske reforme u Bosni i Hercegovini za period 2020.-2022. godina“, ukoliko bude prihvaćeno od strane Vijeća ministara Bosne i Hercegovine i entitetskih vlada, dalje vodi i potrebi revidiranja Programa ekonomskih reformi Bosne i Hercegovine (ERP), na osnovu kojeg je i sačinjen dokument „Socioekonomske reforme u Bosni i Hercegovini za period 2020.-2022. godina“, što znači da je potrebno voditi novi ekonomski i finansijski dijalog koji će biti usklađen sa novonastalom situacijom uzrokovanom pandemijom koronavirusa (COVID-19) i to su procesi koji su uzajamno povezani. Ono što je nepobitno jeste činjenica da svi socioekonomski, finansijski i reformski dokumenti Bosne i Hercegovine u narednom periodu moraju uvažiti potrebu da se pomogne privredi i građanima Bosne i Hercegovine, a revidiranje dokumenta „Socioekonomske reforme u Bosni i Hercegovini za period 2020.-2022. godina“ prvi je korak u tom pravcu i svi budući dokumenti moraju biti usklađeni sa njim.

S poštovanjem,


Dr. Denis Zvizdić

¹ To je važno kako bi se postigao identičan uspjeh koji je ostvaren Reformskom agendom za period 2015.-2018. godina, a koji je prepoznat i u Mišljenju Evropske komisije o zahtjevu Bosne i Hercegovine za članstvo u Evropskoj uniji gdje je navedeno da je „Reformska agenda socijalno-ekonomskih mjera koje Bosna i Hercegovina provodi od 2015. godine omogućila, između ostalog, stvaranje fleksibilnijeg tržišta rada i bolje usklađivanje propisa koji regulišu finansijski sektor sa međunarodnim standardima. Od 2015. godine ekonomija je porasla za 3%. Zbog snažnijeg ekonomskog rasta i efikasnosti prikupljanja poreza, javne finansije u zemlji su u velikoj mjeri uravnotežene, što bi pružilo sjajnu priliku za ulaganje u infrastrukturu zemlje koja je dugo zapuštena ili za početak smanjenja visokog oporezivanja rada u cilju podrške novim radnim mjestima“. Tada je nosilac aktivnosti usaglašavanja bilo Vijeće ministara Bosne i Hercegovine i važno je da ovaj proces ide od vrha prema nižim nivoima vlasti, a ne obrnuto, jer onda nećemo imati koherentne i sveobuhvatne mjere.